

Augsburg, 13. April 1559

An Johannes Oporinus

UB Basel, Fr. Gr. I 11, fol. 225r.

Steinmann Nr. 717.

Lit.: Husner S. 154 (mit Auszug), 160.

S. P. D. Burtembachius et Quietanus rem mihi gratam fecerunt, curatis libris qui vasi tuo inclusi fuerunt. qui multo commodius id quam ego facere potuerunt. Manuscriptum Postelli volumen forte fortuna apud Willerum repertum, Cubiculario D. Bomgartneri ipse dedi. Nam dominum bis quaesitum, conuenire non licuit, nec mihi toties discurrere vacat. Libros a te missos grato animo accipio. gratiam referre cupio, modò possim. De D. Antonio quid sperem non habeo, qui propter te non minus iratus mihi quam tibi videtur. Qui vt nobis max[ime] propicius esset, tamen propter edictum pontificium, vt opinor, opera nostra in posterum non vteretur. Edetur ergo Gregoras, si tamen edetur, in Italia, quantum intellexi, καὶ ἀνωνύμως. Actum etiam esse puto de cedreni additionibus et Zonarae ac Choniatae recognitione. Quo labore equidem non inuitus supersedeo. Mense superiore cum vix caepisse Demosthenem recognoscere, et annotatiunculas commentari, diurna κεφαλαλγία studium meum interruptum. hanc στομαχαλγία subsecuta est qua adhuc et noctu et antemeridiano tempore excrucior. pomeridiano ἀνπνία nocturna sacerienda est. Sic omne mihi tempus perit, excepto eo, quo doceo, et haud scio an id quoque pereat. Hoc ergo statu rerum, de studijs meis penè despero, et alijs scribendi prouinciam mandandam censeo, nec a me exigenda promissa ὑποθετικῶς. Abest enim conditio maioris et commodioris ocij, cuius ego inani spe οὐκ οἶδ' ὅτι ἐνεανιευσάμην θρασυνάμενος, τῷ θεῷ μὴ συνδοκοῦν. Fortassis etiam Morellianus Demosthenes, quem audeo expecto, labore isto me leuabit. Isocratem etiam a Sophiano breui ad Henricum Stephanum missum iri audio, cuius conuersionem nouam inuidebo nemini. Me enim hac valetudine isti labori parem fore non credo. Sin vires aliquando recuperaro, ea conabor quae tibi grata esse intellexero. Vale. Augustae Vindelicorum. Idib[us] Aprilis 1559.

Hiero[nymus] Wolfius
Tuus.